

四庫全書

集部

欽定四庫全書

文苑英華卷九百八

宋 李昉等 編

職官十六

諸將
軍五

右武衛將軍柳嘉泰碑一首

左武衛將軍白道生碑一首

雲麾將軍郭千里碑一首

雲麾將軍李楷洛碑一首

右武衛將軍柳公神道碑 郭訥

公諱嘉泰字元亨其先魯展氏自司空無駭至于展禽
食邑柳下遂因采錫姓魯為楚滅遷於晉之解縣今為
河東解人也洎衛之莊漢之社褒之講論六義琮之黃
金一筭赫弈勲業代有其人夫乾之垂象也上將躔於
五緯坤之導河也中條控於一曲以毓粹應德岳以降
神生賢賢可以為王爪牙德可以為國禦侮孰任其所
事則公庶幾焉曾祖隋左衛騎曹叅軍皇贈蒲州長
史堙厄卑位有才無時李葉蕩而困於先號聖人作而

光於後命祖奭皇中書令河東公厚德載庶物直心尹
天下齊七政於璣衡致一人於仁壽雖子孺之周密方
進之通明不是過也父爽皇贈朝散大夫郿州司空遜
而守忠敏以承德故有臺之樂未寵於皇庭而斯皇之
榮遂歸於泉壤三代繼業盛達公承累行之慶靈稟中
和之粹氣粵自羈貫迨乎成人真其堤防森是矛戟直
節以成果勇溫德而著令儀其行已也恭其親師也謹
其從政也恪其取友也義奉長者之深闕不越中庸讀

夫子之微言取其大畧公幼丁太夫人艱襁褓之內若有所失景雲元年先帝在藩以公女兄為妃則申王之舅以外戚解褐授左金吾衛中侯則知傅昭儀之淑德載誕恭王李夫人之麗容是榮協律公循道執一體正無貳不以怙寵而倨貴不以苟榮而屑禮無何丁鄜州府君艱一粥之食杖而能起無時之號泣以繼血先帝龍飛公猶在疾制令起復疑為左領軍衛左郎將賜緋魚袋腰經外除心喪內毀朝廷遣之開元二年申王以

伯舅重奏公為本府左帳內典軍九年又遷右衛率前
郎將十年又轉剡王府諮議十三年加游騎將軍守左
衛中郎十八年定遠將軍守左清道率或叅柱巖之文
雅或握蘭騎之兵權肅宮道則荀埋疑之清和翊周廬
則衛綰之醇謹二十七年又加明威將軍守右武衛將
軍上柱國賜紫金魚袋任同許褚職惟萬歲戎旅孔循
禁衛斯整煥彼章綬崇其寵榮故一心事君凡遷徙官
位不矯許以沽譽不介獨以轢羣所蒞必聞所適必當

來有其惠去有其恩無潘岳之一除免子文之三黜縉
紳之士以為美談以其年七月遇疾彌留有加無間御
醫驛路中使在門猶能正不溷邪故巫覡莫進歿必合
度故手足全歸以八月四日終於長安開化里之私第
春秋六十有一遺誠薄塋明主驚悼久之詔使就第贈
物三百段粟百石塋者量借手力縵幕威儀蕭鼓飾終
之典斯為盛矣以十二月二日歸窆於萬洪固之原禮
也羽儀道路觀霍塋之紛紛龍虎罔原見勝城之鬱鬱

公萬頃旁注千尋直上碩量瑰材敏識甘節家人莫見
其喜愠時輩但美其風流其存也子罕之不貪其歿也
國僑之遺愛故欒棘斬焉謂之善居也金草不避謂之
從權也貴而不滿謂之鳴謙也仕而守節謂之公器也
疾而得正謂之知禮也終而薄殮謂之達道也詩曰人
之云亡邦國殄瘁其此之謂乎夫人王氏瑯琊郡君晝
哭之外庀喪字孤嗣子祐良等遑遑焉過禮之孝也哀
哉碑篆盡假於余柔翰徒施實慙於墨妙貞石既刻有

愧於色絲其詞曰

將軍本胄出自周後羽父諸族展禽食柳自茲保姓才
與時偶涉河居東賢哲代有鼎氣潛毓河精陰受降生
將軍百夫之首明鑑思鑒洪鍾待扣三紀典兵一心事
后賢妃之季名王之舅梁苑寵崇漢家恩厚朱軒繡軸
金印紫綬渥洼箭雲清平衝斗位纔上將年未中壽遇
疾徹懸全歸啓手杜陵東栢秦原栢阜旌轉城隅烟凝
谷口屬屬孤嶺哀哀孀婦松檟淺深岡巒左右通溝刻

石天長地久嗚呼將軍歿而不朽

左武衛將軍白公神道碑 于益

淳維之地上載斗極其氣勁悍其人驍雄間生將才恢
我王畧其革去故俗鼎從新風建功惟忠戡難以武常
衽戈革每襟邊陲服士連革重代襲祉啓迪後嗣光照
前人可得而言也公諱道生其先呼韓之宗谷蠡之胤
代居南部早入中原漢興論封特命弓高之秩周臣赴
會爰書潞子之班祖廣琛雲麾將軍左羽林大將軍心

膺北軍爪牙中壘徼道以肅期門有嚴父宗禮忠武將
軍左金吾衛翊府中郎將職副緹騎名雄鷗冠驚於誰
何勤以夙夜公誕自朔漠習于干戈太公之符如已神
授孫子之要動皆暗合心傾奉國膽畧禦邊鎮在疆場
統其蕃部尋為寧朔州刺史兼部落主恩附獷俗威除
寇攘軍門罷局虜騎遠遁開元中信安郡王禘以宗室
之賢受登壇之寄每有討伐命公先鋒寇必能嘗險不
避難馘黠虜之首繫林胡之俘仍授河湟大破戎醜數

實過當議功居多一自捍邊三十餘載終于左衛大將軍春秋六十夫積善疇慶嗣續不忘辛氏繼封耿門多將求之於代公實有焉其子朔方先鋒使同節度副使開府儀同三司試太子詹事左武衛大將軍上柱國南陽郡王元光乃勇絕倫而忠能力九伐之際常為戰鋒勞旋策勲議績當最封開八國秩亞三司皇上寵乃茂功義宗追遠恩光照於幽窆厚澤降于豐泉贈公太子賓客夫人康氏為越國太夫人喪事官供有加常等以

永泰元年三月二十四日遷窆於萬年縣鳳棲原禮也
雙旆同引千車會送更刊貞石式建豐碑同武庫之間
樵蘇永禁比祁連之象丘壠長存銘曰

地在玄門代為良將名重關西氣雄塞上繼秉金鉞載
居玉帳戰必為鋒居當保障粵有令子時高茂勲援戈
揮日杖劔決雲東平寇孽西掃妖氛志由忠立名以勇
聞刻茲貞石以表孤墳

雲麾將軍郭公神道碑

楊炎

山之西出將地之右主兵故前有辛李之雄後稱周郭
之盛四族者貔武其人風雲其氣出入千載蕃落憂之
皇唐一宇宙之初數邊蕃之罪太白上而天兵利陰精
盛而神將出於是郭氏之室世並五侯丹華轂者三十
人分采地者三千戶劔騎鼎食氣蓋關山開閣而珠履
成行宴享而山玄滿座中興之俊鴻臚間出始以一劔
而震清海一作漢年未三十名冠雲臺位為國之長城身
主人之大命旂羽葆小韓侯之故事龍旆青社增召

伯之舊封則祖宗之盛未始間也鴻臚卽世關隴不震
天其永思戡定之代故盛業集于金吾金吾名千里卽
鴻臚之孫出於荆藍之中長於松柏之下虎頭駢脅曲
踊雷聲猿臂過挾輶之材鷹揚表下講之志始以將門
子往還隴上開元中西討石國負羽先登特拜游擊將
軍折衝都尉駕龍媒於殷路舞雙劍於前席二十六載
詔公與中使劉玄復開葱嶺以功勝敵不能軍班師授
左武衛將軍特賜衣甲一副超才也後五載有苑門之

後走射鵰之羣拜左衛將軍嶺巖人陣既成列而破石
城天險不待戰而降累遷左金吾衛大將軍驟兼玉門
軍使未行而遇疾嗟呼病生刮骨志屈噉肝累喉白及
之中垂翅青雲之上以天寶十一載二月薨于武威之
第春秋若干夫人弘農郡君楊氏絳郡長史之孫臨洮
軍使雲之女河華茂氣齊姜盛族知疑作和于鳴鳳而外
姻致駕宜爾幹母而君子好逑始於龍劍雙飛中而雲
虹獨感春秋若干有子一人曰某果毅都尉山西將種

塞下雄兒周郎之豪勇冠軍終子之精魂先返年二十
一先公而天郭氏本自周王之穆其在昔也漢有司徒
司空魏有車騎驃騎或竹馬垂信或金玉

疑作
穴

稱豪世

后佐漢以補天賢王築館而為道其在今也一門三戟
六乘七侯伊吾反昭於前鴻臚特坐於長河萬里敵國
四方每賓祭往來蒐除大閱望帶裳者知宗廟之盛執
金鼓者成父子之軍世德後來公其濟美則勳配祀典
中乏主祭之名哀及路人內無朝哭之位此窈窕之數

孰可問哉猶子子鸞善達禮以繼門族樂主辨以濟險
艱荀令君為不亡趙將軍其有子以十三載某月葬我
公于武威東原非緩也實卜年龍蟠天井岡伏山形閱
星象於玄宮起風烟於松闕將軍鼓吹迴過細柳之營
天子輅車出祖茂陵之道銘曰

壯哉強魂凜然風雨一劔劔鯨空拳搏虎錫以翻鼓艘
舳條瑿駢騎佩組革彼莊姜禴翟珩璜言念君子乃心
無忘精返太白魂歸故鄉雙墳巍然流水湯湯秦雲如

牛礪石如羊二龍於此父子同岡

雲麾將軍李府君神道碑 前人

斗極之下曰幽都其氣角立其風精悍常山之下曰涿野其鎮碣石其神蚩尤海岳迴抱府君出焉雲龍感召府君感焉惟天永保唐運故府君來朝克生保臣輔寧大業坐中台者二子銘鼎鼐者六朝當國宣九合之勲昇堂有八元之族府君諱楷洛先族漢校尉之裔也世居其疑北遂食堅昆之地實主崆峒之人大為王侯小

為侯伯其精薄日月其動破山川厥後東遷復為鮮卑
之右府君英明淳渾神踴天飛威嚴生介胃之容魁岸
本山河之狀雙舞長劍左盤凋戈虎嘯于窮溟雲從於
大澤有沉謀以忠一作惠中國有長技以服諸戎天子聞
而思之密命竒士要之信誓君子曰井谷不可以遊龜
龍儀埴不可以栽松栢淮陰去楚百里絕虞尚父從周
樂生歸燕此必精合於王霸魄見於祥符宜乎萬方而
趨一言而感矣是年冬府君與帳下騎士言曰吾乃祖

本漢將辱於單于之庭而今千年大恥壯士當建功大
國上駕真龍曷有遇風雨而泥蟠無卷舒以蜿變由是
奮躍遼海翻飛上京其來也戎羯生憂其至也幽燕罷
警上御前殿庭列千官鍾石畢陳君臣相賀始問其姓
因賜以家族特拜玉鈐衛將軍先賜以大弓文馬又拜
左奉宸內供奉升玉堂殮沆瀣矣帝曰余欲成幽都殪
死市乃命府君為朔方討擊大總管於是雲麾鐵騎川
動地踴左飲青海北登狼山帝曰余欲宅岵夷破鴨綠

擊靺鞨俘林胡乃命府君兼幽州經畧使於是間榆關
橫障塞三以奇伏五以勝歸帝曰余欲軍北方之野乃
命府君為清軍於是敵也無氣燄之作士也無踴躍之
勞帝曰欲護坳牧使於是憑列走隊法掩亭院神螭水
瑞孔阜充碩帝曰余欲書日月之常教熊羆之旅咨爾
職典彼朔方復命府君為節度副使於是鎮之以德宣
之以威師和年豐罔或不若帝曰余欲配鈎陳之位養
死事之孤乃命府君為左羽林將軍於是蓬頭射聲上

貫牛斗帝曰余欲屠石堡疇其代謀僉曰府君乃命佐
中權發大號於是玄黃灑血玉石俱摧載闕中兩蕃不

庭有詔府君尋盟舊國單車從漢二憾來同敵人變心

懼我為患乘主客之勢合貔貅之克甲興于門車結其

外府君復為死地甘為國羞仰而騰駒若與神遇橫跳

出於虎口伏念歎於龍顏的盧之師惡可喻也吐蕃之

寇河源衝下憑矣矢石交作府君以精騎一旅濟河之

而一作南萬火燎乎他山三軍出其間道驚寇四潰重圍

自解加竈之奇孰云多也初府君將赴征西謂所親曰
余往必尅敵殆不能歸及班師獻捷歿於中路明達人
之委順君子之終鄧公之勇曷其智也至若秉季布之
然諾法穰苴之政教動於軍誌舉合吏能奇謀絕於揣
摩故事留於風俗神對厯象精缺晦明勤道不形進而
人莫見也為政以德寵而久彌尊也始自天后之末至
於聖皇之朝前後錄功凡二十四命食邑二千七百戶
封薊郡開國公又加雲麾將軍叅定國者兩軍拖侯服

者四紀會兵車者百勝出帳下者千人國有事未嘗不
動勞無私可謂知禮故得大命三錫重侯累封輅車山
玄藏于大室壯圖未極沉疾生勞臨合浦之秋伏波將
老望河源之道征虜不歸某年某月日薨于靈州懷定
縣之師次享年六十有七追贈營州都督賻物三百疋
米粟三百石以明年某月日詔塋于富平縣檀山原禮
也夫人某郡都鴻臚卿某之女異氣祥合高門鬱興卜
隣也鍾鼎再懸受祿也夔龍在席元子太尉臨淮郡王

兼侍中光弼河圖鈎合上感神精磅礪于陰陽之和同
符於元命之紀次子將作監光彥氣含精勁仁服孝慈
列侯于千石之家從事于四方之志少子太保光進命
匹忠義縱橫知名天之辰象物之粹靈乾元中大尉以
東諸侯三會于河再以駮髻濟于淮海天子美齊桓之
志系凡蔣之盟以府君炳德丕赫積流仁慶追考功績
發于簡書謚曰忠累有褒贈號韓國夫人於是建廟堂
命宗祝室有山龍之服饗有金石之和昭宣令圖煥然

銘篆以炎掌史之官也奉命為詞徘徊大名頌耿奔有
終有慶慷慨觀德羨張仲為子為臣銘曰茫茫上天下
降狼星崆峒之野焜燿其形於赫巨唐風雨是經矧伊
本邦曷不來庭煌煌府君為國之翰從順干戎威讐勤
亂陰剛萃靈敦碣精悍志不可翫綿綿塞草天地疑之
下北拒狼山野無敵馬殊勲大績玉劔玄社天空武庫
海折崑崙在昔遺慶魯之臧孫曰聖在天勤于至道既
命太尉亦崇太保一門四龍三作元老赫赫元老氣合

清貞白髮垂冕高堂有親帝命韓國祚于夫人亦詔薊
邱下寵明神左鑿貞石垂于將來矧我洪勛上懸雲臺
彼邱之頽此澤之堆悠悠今息萬古不回

文苑英華卷九百八

欽定四庫全書

文苑英華卷九百九

宋 李昉等 編

職官十七

諸將軍六

忠武將軍茹義忠碑一首

驃騎大將軍論惟賢碑一首

鎮軍大將軍王榮碑一首

忠武將軍茹公神道碑 張賁然

在昔帝軒之裔有控帶絕塞擁據羣雄殆於斯萬年得茹

如之部謂名王盛族大人鴻胥聯華魏室接慶齊庭鐘
鼎焜耀於數朝土田陪敦於列辟自拓跋宇文氏降為
著姓焉則公之先也公諱義忠本家鴈門今為鴈門人
矣祖惠隋定州深澤縣丞父簡皇澤州永固府左果毅
都尉莫不果行毓德脩身踐言以北方之強為南金之
寶英風雋列海內知名公特稟元和偏鍾間秀瓌貌傑
出雄鎔挺生幼則知書長遂多藝知人能事靡不盡善
有識一見即以遠大相期然而家傳崇業尚豪舉雖曰

雅好博物終恥猶為腐儒未嘗不一心殉邊百死許國
與孫吳而暗合以驃衛為己任開元中以良家子戰功
居右補涇州四門府別將策勲之授也久之秩滿六鈞
伎癢七札賈餘歷試粉闈長驅金埒措杯入妙曾不出
正相圃擇賢觀者如堵以武部試甲科改授河南府王
屋府果毅加游擊將軍用絕倫也累遷汝州魯陽府折
衝尋改號州金門府折衝驟增武功級叙忠武將軍夫
其策名委質積行累功祿以實干職無越請雖晉用之

有次亦周行而未高至於幕有急賢司有渴理仁資規
畫爭請於弘羊武藉詞華競留於阮瑀豈直軍形疑地
勢聚米成圖抑亦國要時湏立談集事是亦為政奚必
褰帷之與縮墨歟但以公之德之才令問令望執先府
君先夫人之喪也二連之孝聞與上交下交之契也三
益之信者在師旅有不可犯之色於鄉黨則謙似不能
言寬猛得其中卷舒合夫禮可謂古之文武不墜斌斌
君子者矣擁旗旄享茅土亦術內之事耳性頗樂道情

兼慕閑每凝想於清高不致身於趨競僂俛芳歲蹉跎
後時未展丹心徒嗟白髮命之不偶李廣寧遂於封侯
生也有涯賈誼終傷於嘆鵬天寶元年蓋寢疾者浹日
以六月十九日薨於京兆長安縣太和里之私第春秋
八十嗚呼哀哉梁木壞乎將墮隳矣罷市無喻輟舂如
何有才子三伯曰元顥皇易州遂城府左果毅仲曰元
晃左羽林大將軍季曰元曜則今之驃騎大將軍行左
羽林大將軍知軍事上柱國鴈門郡王當斯時也靡不

血泣無訴柴毀過人即以其七年七月十六日塋於京
兆長安縣永平鄉阿房殿之墟禮也先是夫人陳留郡
君謝氏贈沂國太夫人語成圖史動合禮容德重陶親
賢過孟母然而當年桂歇早歲蘭摧石窳之封徒高薤
露之悲終積於戲大業之後景系之餘間雖陵夷小不
進用尋必福履大賢出焉故公以之陰隲於身善積於
物河瀆為之吐秀山岳為之降靈挺然鬱闕生夫驃騎
矣皎若片玉粲如渾金明月照人干將立斷長才廣度

茂績殊勲羽林應上天之星鴈門封塞下之地公侯必
復斯之謂歟若不然者則湏疑以凶豐次鍾伯早世克
家紹構孑然一人而能叙終身之悲展固極之痛二十
年上有詔贈公為汾州刺史拜冊于先塋斯亦可謂事
親之禮終哀榮之道備矣且陵或變谷海有為田滕樽
未開防墓誰辨匪憑不朽之石曷傳無婉疑作媿之詞爰
訪墨卿以述銘曰

秦殿南趾漢池東曲莽蒼開原蕭條古木于嗟鴈塞赫

矣雄族昔也擬金茲焉埋玉鎮鄒徒挂大屈終藏日色
不暖風枝自傷萬事颯而烟盡片石歸而天長庶德祖
之來思無慙黃絹幸仲宣之見背不墜餘芳

驃騎大將軍論公神道碑

呂元膺

公諱惟賢字惟賢其先西土人也高祖諱東贊作相于
西戎因官立姓遂為論氏貞觀中威懷四裔平定北庭
蕃戎款附萬里獻琛慕嚮革風欲為和親延頸企踵心
馳闕下太宗皇帝覽其誠至遂許之公王時戎王遣相

一作祖

東贊為使來迎不忒其儀不愆于素召見顧問進

退合旨詔以瑯琊公主外孫女妻之東贊自陳以本國

有妻又以贊府未謁公主陪臣不敢先授

疑作受

殊寵太

宗嘉之又竒其對撫以厚恩遂有歸化之心曾祖陵與

祖躬仁同總衆于東至高宗朝拔部落七千餘帳歸國

拜特進左玉鈐衛大將軍封歸懷郡王褒忠獎誠寵錫

殊厚子孫因家自銀州至於京兆祖躬仁朔方副大總

管雲麾將軍行左驍衛大將軍酒泉郡開國公贈撥川

郡王謚曰忠自高至大父皆有勲烈著于當時父誠節
朔方節度副大使開府儀同三司右金吾衛大將軍知
階州事武威郡王賜太子太傅天寶季年安祿山作逆
塵起山東皇上省方于巴蜀肅宗巡狩于朔陸危亂之
時見其臣節帥子弟及家僮以牧馬千馮罄其財用以
奉禁旅公少有志尚奮身轅門隨先父統其士馬與元
帥哥舒翰犄角扞寇鋒刃既接大小數十戰摧陷堅陣
洎王師失御以智信保全所領之軍馳于靈武扈從肅

宗與先父洎乎昆弟立勲成効不可備述至德中授壽
府典軍次授左衛郎將賜紫金魚袋俄轉左監門率又
遷左領軍衛將軍又特進右領軍衛大將軍西平郡開
國公食邑三千戶元勲之肩受茲光寵先時代宗皇帝
為天下元帥求武勇之士公與兄懷義惟真同為先鋒
討擊使又領部落數千人鎮岐陽縣被堅執銳一月三
捷洎除亮清亂至上元二年授特進行大光祿兼右領
軍衛大將軍充鳳翔節度副使馬軍兵馬使寶應中丁

艱茹荼朝廷以金革從權由斯奪禮廣德二年授開府儀同三司殿中監充劔南節度副使大歷中受開府儀同三司太常卿上柱國進封成國食邑三千戶旋受渭州節度都知兵馬使公以從戎歲久雖齒髮未衰而疾疢屢作代宗寵其勲舊詔許還京仍全祿賜同大將軍俾其優閒建中末德宗遷幸巴梁公以所疾沉綿不獲危蹕逆臣朱泚迫以克威不變其志雖積年之疾累日而瘳貞元十五年授驃騎大將軍行左武威衛將軍上

柱國公斯實朝廷獎舊勲矣止足求退俄以本官致仕
中使就閒寵秩有光元和四年七月十日寢疾終于靜
恭里之私第以某年十月一日塋于萬年縣洪固鄉之
古原故夫人太原王氏祔焉詔給鹵簿鼓吹所以褒寵
也嗣子輔鼎同州白水縣丞次曰侗常州江陰縣尉次
曰俶右領軍衛騎曹叅軍泣血茹荼存無改之義公之
季弟惟明為時英髦文武備用建中興元之際仗義討
逆摧殄兇徒勲彰險艱謀著忠益一作益貞元初以太常

伯執金吾授鉞渭北八座上相崇獎忠功元膺獲佐戎
幕備閱忠義由是盡知公之世業勲德矣銘曰

大忠之肩本自西土奕也崇勲既明且武在太宗時有
道攸覩洎夫撥川緒業光輝天寶季年塵起幽燕自與
其家殄寇功全乃拜公侯寵榮無替用表豐碑昭於東
裔

鎮軍大將軍王榮神道碑

戴少年

天列鈞陳之象國維環衛之儀蒼旻立程圖謀斯載心

齊之寄賢良是疇苟非副慎選曷以將軍累代而居其位焉將軍姓王氏諱榮字榮與本太原人也肇自軒后延于周室自靈王喪道黜太子晉於河東時人號為王家子孫因以命氏子晉生宗敬為司徒至秦始皇大將軍翦子曰賁孫曰離皆以武畧著名列于戰國策及漢昌邑中尉吉博通墳典形于書籍生二子長曰霸居太原次曰駿居瑯琊公即霸之後矣自翦至魏凡三十四代有昶為征南將軍後遇西晉陵替子孫有過江者為

江東盛族其不往者代有賢豪史傳備彰此無縷載隋季喪亂龍蛇起陸爰有唐之始祖舉義師于北京惟公之先宗嚮雄風于西土繇是弈葉承緒因家上京曾祖玄皇越州長王父思獻唐元功臣行右龍武軍大將軍父崇俊皇開封儀同三司行左龍武軍大將軍事豈國公兼京功德使贈太子太保慶有所屬世無乏賢猗歟將軍即太保之元子也高門有嗣羨玉無瑕識鑒精通知謀周達忠孝立志溫良飾躬總角精乎兩經弱冠窮

于三畧文武不墜剛柔得中風姿逸羣果斷在已公門
家子也肅宗皇帝美公先父有勤勞于國有訓導于家
爰自妙年授公左龍武軍司戈廣德初轉本軍中候未
幾遷同州伏龍府折衝賜紫金魚袋本軍衛宿衛皆特
降恩煦寵於勲賢代宗之初蕃戎豕突烽燧西舉鑿輿
東巡公之父子俱為侍從翼戴往復公家是先特拜公
陝府元從游擊將軍守左龍軍馮翊府左郎將上柱國
太原縣開國伯食邑七百戶公以恪居韶淑之年志出

雲霄之路勤守職業色養無虧雖居長上以公代有勲績將施延賞之恩特賜故右龍武軍將軍李敬照長女以其令淑有聞日內而降疑作烽為公之夫人也恩逾國

戚寵過常倫服琉禮義無非常賜渥澤霽濡未之前聞公謙冲有怕恭儉無替並謂禍生不意家釁存臻公柴骨棘心居苦枕塊左右墳闕薦莫朝哺覩之者涕零聞之者惻怛可謂至孝之至恭仁疑之數年後遷右神武軍翊府中郎將尋改右清率府率建中末賊泚勝奸乘

其不虞禍起肘腋宮室蜂蠆車駕郊畿公乃奔馳扶輪
躬奉矢石出歿生死羽衛君王是知仁者必有勇也上
嘉其誠特封武威郡王食邑三千戶實封五百逮于克
復城闕載酬厥勲興元初拜奉天定難功臣雲麾將軍
守右監門衛率府率尋充左龍武軍南仗使八年轉左
內率府軍職如故公家之事知無不為書警暮巡考課
尤著者有詔補本軍通直將軍職其將遷望亦增重松
竹之操森然可觀貞元來特拜左龍武軍事居文明之

代翊舜禹之君嗣業既彰軍風載振昔弘農楊氏四世
三公太原王君三代三品於戲德宗皇帝奄忽昇遐順
宗欽明踐祚皇極公以冊立之重拜御史中丞尋加鎮
軍大將軍賜一子正員八品改贈先父太子太保殊常
之澤併集公門雖承湛露之恩不易履冰之誠霜仗增
肅天門益雄規謀昭彰職事修舉前後倫類莫之與京
於是書芳躅於武經寫丹青於麟閣俄乃紫微遷位皇
室薦哀二帝山陵六軍扈蹕羽儀爭勝公也推先煥采


寶歷新昇恩加近侍遷本軍大將軍兼御史大夫佩玉
腰金朱門綵戟昔馬援有伏波之號班超揚定遠之名
雖門望同途終華裔別實豈若登壇柱國授鉞中朝晝
列彤庭暮嚴清禁渙汗之重孰云比肩至如君盡其臣
忠子及於父位萬乃有一公其獲諸公之性也矜孤愍
窮寬仁厚德不伐其善無施其勞忠孝仁義全乎始終
財帛洽於姻親粟祿霑于鄉黨享福君疑作居崇固其宜
矣公當拜命之始將軍疑有事於南郊獻鋒銳者盈於

九門執玉帛者來于萬國公為六軍之首將持百代之
名敷陳盛儀迥出羣格美望充於朝野嘉聲達於聖聰
因賜二子出身用旌厥德公竭其筋力罄于心神靡盬自
哀積勤致疾天醫繼路御餌盈庭雖上命以惜賢竟膏
肓之罔救公累官十任歷事五朝謀猷克申威惠斯在
猶以遺訓貽乎子孫身後之儀靡不詳告有始有卒公
其得之公嘗謂知己曰大丈夫誓當開拓疆境掃滌撓
搶誅鋤奸克廓清華夏致君堯舜之上榮名管葛之前

豈可保位金門坐安天祿而已何乃壽齡不永事與願
違未盡所試奄辭明代嗚呼元和二年十月二十一日
薨于道政里之私第享年五十有六萬乘眷勲勤之德
徹食傷嗟三軍思撫育之情攀轅慟泣意夫下氏之玉
絕跡於良時隋侯之珠韶光於幽壤翩翩盛德足繼前
脩疊疊餘風揚乎後代亦可謂歿而不忘者也來年十
一月二十四日丹旌既舉青鳥告期有司上聞錫塋殊
等出天厨以饗奠俾中貴以臨喪鹵簿溢于郊衢笳簫

震于阡陌寵光存歿澤被幽明棲神于鳳城東南龍首
原先靈之左禮之至也夫人隴西郡夫人李氏婦德柔
明母儀貞順視孤惻以灑泣撫靈櫬以銷魂追思飾終
罄竭家產嗣子朝散郎前行左內率府錄事參軍太原
縣開國公諒及王女等或婉淑冲和或貞剛勵節各稟
家訓脩于令閭絕漿豈獨於曹叅負米猶思於子路終
天因極叩地何追慮嘉躅之遺聞請脩文以記德予以
素承交契見託臨終辭之不俞聊載貞石銘曰

顛顛聖君兮諤諤良臣惟德是輔兮皇天匪親國有環
衛兮天有鈎陳心膂之寄兮疇咨哲人將軍之孫兮將
軍之子開國承家兮提綱振紀君臣浹洽兮永冀終始
形圖彩閣兮名列青史彼蒼者天兮殲我中賢皇王軫
悼兮士旅潛然于以展思兮式薦奠筵于以飾終兮鹵
簿旌旃龍首之原兮鳳城之前蕭蕭白楊兮窅窅黃泉
立石刻名兮紀勲紀德揚名播美兮千年



文苑英華卷九百九

欽定四庫全書

集部

文苑英華卷九百十四至
十四

詳校官庶吉士臣龍廷槐

助教臣常循覆勛

總校官進士臣朱 鈔

校對官助教臣羅萬選

謄錄貢生臣郭 坦

欽定四庫全書

文苑英華卷九百十

宋

李昉等

編

職官十八

諸將軍七
將校附

唐左羽林大將軍史用誠碑一首

周右衛郎將楊令一碑一首

唐右衛郎將葛威德碑一首

唐上騎都尉高則碑一首

唐昭武校尉曹通碑一首

唐左羽林軍大將軍史公神道碑

奚敬玄

將軍諱用誠字君諒河南人也曾王父諱惟靜開府儀
同三司檢校太子賓客兼侍御史河南節度先鋒兵馬
使大父勒銀青光祿大夫試太常卿兼侍御史河南節
度兵馬使烈考播銀青光祿大夫檢校國子祭酒河東
節度兵馬使兼御史中丞普寧郡王三代為將克昌惟
武垂慶後世傳芳于公公即中丞第四子義感得一時

之俊沉謀有周身之防貞元初藝成絕倫縱遊郡國名
藩重鎮爭致邀迓乃不屑就其道益光襄陽節度樊公
澤虛心好才與能樂善聞公有縱橫之畧剛決之姿由
禘禮以接之選右臧以署之而能恪勤厥位練習武經
繇是樊公益所委重累遷至馬軍兵馬使會吳少陽卒
其子元濟席凶器以竊據淮蔡詔命唐隨節使李公愬
總齊軍士以討伐之命公為遊奕兵馬使指顧麾下號
令前驅率先啓行深入賊境遇敵必戰所向無遺會賊

將領徒千人草創營壘旗號日興橋柵而公伺其軍食無儲是刈是獲備其乾餼鳴張蟻聚控扼要害公度其孤虛可以攻取以少擊衆如其前堂堂之勢若然中斷殺傷奔潰靡有孑遺生擒賊將衆皆請殺而公不聽以客禮待之曰吾不能殺義士從其歸死於天子乃送其人于闕繼而陳章疏懇請全活憲宗皇帝英明聽斷詔下許之還賜軍前驅使俾領先鋒將興公偕行遵其銳卒馭寒之夜凌犯雪霜擊破賊城官軍坐入先擒元濟

以檻車獻於宗廟得正刑典由公之生致賊將化為忠
臣覆其妖巢以功補過朝廷推賞累寵旌節授公銀青
光祿大夫檢校太子賓客兼御史中丞仍賜上柱國詔
曰素抱將才能通武訓策名戎旅委質藩方敦七德以
招懷推一心而撫納遂使戴天之大節因事斯彰奉國
之名謀逢時乃合奮其勇士潰彼克徒堅壁洞開罪人
斯得水言實效無忘寤思其圖爾勞是舉朝典旋以東
平不度將議征討詔命李愬為徐泗節度俾行天誅愬

以公沉勇夙彰思同王氏列名表請委以親兵充行營都虞侯公恪勤無私戰陣有勇破賊柵者有六收縣邑者有三教令必嚴刑戮不濫仁而有法且若是歟賊平遷檢校國子祭酒詔曰平齊之役諸軍指期衆校合戰各奮義勇同樹勲勤永思積日之勞頗愧踰時之賞故於獎授有所超遷時屬邊事重難非公莫可詔統麾下鎮防朔方居三年朝議以頻建茂功位未充量趣徵赴闕除左羽林將軍詔曰沉勇英決挺直將才制勝出奇

合於兵法風勵勤王之節嘗從伐叛之師赫然殊功於
是累振諸侯方岳多有薦揚北路親軍寄雄心膂統率
貔貅之衆申明羽衛之嚴宜獎壯猷且兼峻秩敬宗皇
帝以張韶作亂禍生不測環衛嚴整狂賊誅夷拜兼御
史大夫歲月滋深竭誠盡瘁遷大將軍知軍事疏封列
爵褒寵勲賢勞績既彰優榮斯及封武昌縣開國子食
邑五百戶上方倚注信臣錫宴別殿論功校藝公實居
多方委爪牙之雄未兼鐵鉞之寄竟以積勞成疾憂國

忘身太和四年歲在庚戌冬十一月乙未薨于昇平里
之私第享齡五十九皇帝軫悼廢朝賻禮加等粵辛亥
二月十五日甲午葬于京兆府萬年縣長樂鄉宋侯之
西原後三月詔贈工部尚書表勲臣也夫人李氏從夫
之貴封趙郡夫人淑慎明賢而能正婦道即哀盡哭動
合禮經長子宗簡福王府叅軍次子宗授一子出身幼
子福郎小女平娘孩啼孺慕絕及旋懷抱以敬玄昔因
朝奏相遇諸途語及戰伐之事備聞功業之本其子以

理命見託固徵斯文而表諸道蓋不虛矣其詞曰

惟天生人必以類分定亂以武克生武臣泚泚史公振
輝羣倫正直不回剛決無隣沫若膏雨煦然陽春濟以
寬猛施之威仁三代為將道家所忌為將四世彌彰勇
毅制勝料敵善利全活擒生度材任知寒天雪夜萬里
齊轡攻討賊城致之死地干戈將戢弓矢載橐懋功既
立爰議賞勞謙闕愈彰寵錫彌高貴婚華憲輝映賢豪
王者之師勝殘去殺由不得已在懲桀黜惟公訓齊確

然不拔令亦寬簡政不苛察羽林震衛克壯其猷推心
誠膂練習貌貅忘身奉君勞積生憂運促潛奪名無建
侯追榮八座寵錫威武塋于九原軫悼明主勲名獨在
骨肉歸土表行豐碑垂休萬古

周右衛郎將

集作宣
威將軍

楊公碑

張

說

公諱令一字令一太州仙人掌人也隋司徒觀王之玄孫
周孝明高后之歸孫今司衛卿之元子維有隋接三統
建萬國我高祖以同姓為王維皇周敷九族叙百官我

諸楊以外戚而貴公體玄黃之純粹承河山之丕緒孝

乎內炳忠焉外灼

集作均

性與天和道合仁愛收恤孤老

分產踈屬泰於周施約於妻子加以樂善而好學降尊

而容衆能辨樂和思柔酒德容止可度溫溫如也文章

可觀彬彬

或作繁繁

如也淵英皎穆當世碩士與之遊焉而

曰君子若夫漢魏鼠族有恩澤之封公卿門子有良家

之傳

集作侍

公浮雲世祿匪石儒風究乎王道之紀綱明

乎人事之終始年十九舉進士高第授潞州叅軍轉千

牛胃曹遷洛陽尉從班次也居無何拜朝散大夫行通
事舍人俄而加太中大夫檢校天官員外郎夫行人之
在周禮方國是接公脩其政令帝曰予嘉郎官之著漢
儀列宿是應公司其典故時稱邦則國家左賢右戚一
武一文以公地望羽儀寄深虎旅除宣威將軍行右衛
翊府郎將僂俛從事非其好也初公時為郎也遼蕃肆
擾作患幽冀皇上燠體下人故我有神兵之役選達權
靡盬之吏佐猛毅維城之師乃下制以公為兵曹焉實

有密贊軍政獨飛長策豈云卒乘輯穆戎機式序若此
而既哉俾雷霆颺動勦匿殿邦威玄兕懷黃龍馬未汗
而狄盡人不疲而兵戢者公與有力也及班師振旅冊
勲踰時帝用咨有司之遠古念有功之未錄將遷德命
需多勤有日矣方當翼大化增三光之明熙天秩垂九
德之聲昊天不惠癘氣流行如何斯人胡不眉壽年四
十一聖歷元年夏六月辛丑邁疾而卒嗚呼哀哉梁木
惟施予道不究呱呱稚嗣仰號蒼穹哀哀嚴親臨淵

谷遐邇寮舊既乎欽風未識之徒罔不盡

一作虫作盟

朋悲而

冀

一作增

敬矣天子憫焉弔之以玉冊贈之以錦衾羣公

傷焉誅德於素旆圖像

集作體

於青史粵乙卯假塋於合

宮縣平樂鄉之北阜郭門十里却山西岡巒萬古之阡

都邑九重

集作原

之地隧寄新壠魂懷故域貌是諸狐未

遑歸塋平生志事孰已焉哉厥第五人比才連譽曰踐

一獻一循一惟一尚一等因心則友世稱萬石之閨門

死喪之戚吾見伯淮之兄弟僉曰我圖後事日月除乎

我龜云此地陵谷居乎我乃布哀友生託詞懷舊迹德
表墓示之來昆其銘曰

洪河南注少華西峙氤氳靈會生此君子生此君子惟
國之紀宣慈惠和禮樂文史敦錫宗類汲揚徵丕勤能

集作然

濟物若不由己克明從政

集作訓

誕膺

集作敷

厥美脩

辭比闕潤色東里揮翰文昌列星順畧交戟禁衛為王
爪士允武允文翁歸是比疇曰禦寇諗軍北鄙攘敵黃
龍濟師蒼兕將王玄默繫公是恃帝懿乃勲將圖膺仕

仇仇執憲不我力以役役大勞未受多祉景命無祿洪
基中圮父兮葆鬢孤兮稚齒孔懷靡及凡伯瘁止陟彼
邱山邱墟歲磔荒壠集作章無際羣哀所起于嗟楊侯託
居此矣沕滴綿曼德音不已久客思鄉永懷桑梓

唐元域府左果毅郎將葛公碑

前人

公諱威德字某曰葛氏京兆涇陽人也其先嬴姓咎繇
之後夏有葛伯氏族興焉寧陵之傍尚傳侯國綏山之

下獨有仙祠嬰則威服五城襲則績稱二縣鴻臚秀於

吳會散騎崇於晉京

景集作

在其子孫是宜繁羨公生而

開朗長而英拔非因馬鄭之學動合禮經不待孫吳之
書暗同兵法有拳勇尚氣槩顧盼稜華風神都爽五馭
善於東野六射勁於西霜少以嫖姚之才入光供奉之
選御橋駮駕犯清蹕而不驚輦道啼烏應鳴弓而自落
便蕃左右星歲重深贈上柱國拜元城府左果毅天下
大定李廣之用無施雲中薦賢馮唐之言已老春秋六

十有五神功二年某月終於落師藁殞卽阜夫人太原
郡王氏夫人郭氏實生大將軍福順一見聖主再紐乾
綱重位冠乎北軍茂功藏乎南史故象服臨祭魚軒以
朝天子深嘉嘆馮勤之母羣公列拜賀虞潭之親享年

七十有五薨於京兆之三真里公愛敬奉親軌則可

集作

可移於後代義方訓子福祿

集作祿字

來及於先人塋有日

矣乃下制曰禮著飾終情惟悼往詢前列抑有舊章前
左羽林軍大將軍葛福順亡父某字某謙素弘此藝能

未展才術奄從凋湏而嗣子克家式昭勲業既念功以
追遠亦自業而流根宜申獎贈俾慰泉壤可贈游擊將
軍守左驍衛翊府郎將開元九年二月九日塋我郎將
君軍前夫人王氏後夫人郭氏祔焉禮也章帝以遂輅
旗在列廟食備其牲牢法塋陳其簫鼓孝慈之道著矣
哀榮之禮備矣尋彼平生之事忽如絕光繫乎碑版之
才永存遺烈銘曰

闕

角立傑堅神銳玉劔氣雄金鼓六藝爰設射

馭為武百行雖多

集作名

忠信為王時不兼命位不充才

善流慶答身謝榮來太原棣棣寔惟嘉偶羽林桓桓克
大其後

唐上騎都尉高君神道碑

楊炯

南方火德陽精赫雷電之威西陸金行秋令毒風霜之
氣達其變聖人所以定天下之文象其宜聖人所以觀
天下之變或衣裳六合舞干戚而掃虔劉或鍾鼓八紘
用甲兵而誅暴亂若夫皇天失紀彗孛飛流后土不繩

集作
網是

山河崩竭蚩尤食石交

集作
災

害於生人項羽拔山

憑陵於上國天子聞鼓鼙之響思將帥以龔行將軍屬
甲冑之容攬英雄而決勝則風雲潛感豪傑挺生得七
星之武曲破軍受五運之金多木少四時繁弱射連尹
於崧山萬辟太阿殺顏良於官渡然後達人知足徒興
集作
從白髮之歌烈士狗名不受黃金之賞與夫棄其筆
墨漢家封萬里之侯稱爾戈矛集作
干戈周王命百夫之長
豈可同年而語哉君諱則字弘規其先渤海人也後代

因官遂家于涇州之定安

唐書作
安定

縣神房阿閣太山橫

日觀之峰金闕銀臺滄海蔽天虛之岸風土形勝關河
表裏三分六州之大業師尚父贊其經綸一匡六合之
元勳齊桓公拓其疆場高柴至德籍東魯之聲名高鳳
沉研盛西堂之學校英才磊落而秀發人物蟬聯而間
起三光不墜察高星於太紫之宮八柱無疆奠高嶽於
中黃之域曾祖冲北齊鷹揚郎將周右屯衛清宮府別
將成軍夜火教戰秋風九天揚後一之兵六合擁前三

之陣張生

良集作

入漢行觀滅楚之徵微子奔周坐見亡

殷之兆祖赦周褒郡南和縣長陶元亮攝官於彭澤道

契義皇陳仲弓歷職於太邱德符星緯飄風驟雨不入

集作

過 灌壇之鄉暴武蒼鷹潛出

集作

瑕邱之境考才朝

議郎止開府孫子荆之天骨亮拔不羣王夷甫之道心

神鋒太峻議郎清秩懸符處士之星開府崇班上接台

階之位君雄心獨斷猛氣無前用兵書六甲於自然知

射法三篇於性道早圖星象管公明懷察變之心幼識

旌旗

集作番

陶恭祖有行師之畧屬隋人板蕩天下崩離

朱陽夾飛鳥之雲紫極現

集作怒

雄雞之象陳兵爭戰窺

玉策於中州姚石壇場竊金符於寓縣我高祖黃雲大

帝白水真人風雷海嶽之神精天地陰陽之正氣媧皇

受命殺黑龍而定水災漢祖乘

集作應

機斬白蛇而開火

運君夜觀乾象晝察人情審熒惑之訶謠驗

集作考

嵩山

之讖記關中王氣不勞甘德之言沛國真星無待殷馘

之說賊薛舉豺狼梟獍檣杌窮竒守幽

疑作集作幽

隴以行

災負關河而作孽天王按劍出軍於玉帳之前猛將分
麾受律於金壇之下以義寧二年王師薄伐趙國公長
孫無忌精兵若獸利器如霜問君以帷幄之謀待君以
心腹之寄營當月暈因八門之死生陣法天星乘五將
之關格蔭華蓋歷明堂以我和而制其離以我直而摧
其曲敗楚師於栢舉未足權衡執秦桴於峭陵無階等
級此實君之功也其年詔授朝散大夫賜物三百段排
患而釋滯功成而不居比踈傅而辭榮追留侯以高蹈

三靈革故君子於焉待時四海清平謀臣以之歸第自
太王基命成康隆玉版之圖高帝受終文武盛金刀之
業家給人足天成地平猶勞水旱之餘尚想京坻之積

咸亨三年春奉勅於河陽檢校水運使

集無使字

搜粟都尉

河堤使者銅橈鐵舳蒼鷹白鶴之舡竹箭桃花貝闕龍
堂之水引紅粟於淮海汎歸舟於秦晉遂使齊臣獻納
先陳不減集作洄之名漢后絲綸即有常平之號望千石
之氣可以療饑開萬箱之儲自然知禮此又君之功也

其年詔賜上騎都尉嗟夫河流曲直天道盈虛鬼神莫
之要聖賢莫之預高臺下泣孟嘗君之惻愴可知梁木
興訶孔宣父之平生已矣上元三年春三月日終于樂
邑里之私第享年七十六惟君魁梧動俗符彩驚人忠
孝天資溫良日用一門兄弟盡同鍾毓之車千里賓朋
時命嵇康之駕每至白雲生海素月流天未嘗不顧眄
山河抑揚琴酒馮異異字集作公孫之大樹對諸將而無言集有
禽字禽子夏之名山謝時人以不語集作而四林遊及八水長往

忘筌能祛有漏之因早得無生之法雖十年俱盡陸士

衡之長嘆

集作歎遊

有徵而千載猶生藺相如之壯心恒在

即以冬十月丁酉塋於定安東南二十里之平原禮也

陶公相宅郭璞占墳面丹鳳而背玄龜兆青鳥而徵白

馬三百篇之後卜筮何從二千石之榮子孫無替長男

仁叡中男仁楷少男上護仁昉等或體窮三變潘陸不

足以昇堂或力敵萬夫關張不足以扶轂有元方季方

之長幼傳學詩學禮之門風金友玉昆忠臣孝子窮號

積於心髓創鉅纏於肌骨星辰已變昊天無報德之期
霜露潛移君子有終身之感堊之以禮垂制度於三王
思之以時別蒸嘗於四季然後按常賢之舊德叙潘岳
之家風戴逵銘北海之文張昶刻西山之石若使鄧將
軍之一見自得嘉名魏太祖之來觀懸知絕唱其詞曰
金闕千仞銀宮百常發揮雷雨震動陰陽山水形勝人
神會昌九州霸業賜集作履勤王樂只君子邦家之光
驚雷氣候大昴徵祥運屬飛海時逢吸霜中原逐鹿西

嶽亡羊漢起高帝周興太王乃披荆棘即闕壇場國步

猶阻黎元未康將軍不拜使者相望陣合星斗兵符玉
璫殲夷叛逆刷滌邊荒化穉三代時清九皇猶思禮節
尚試堯湯漕通淮海水泛舟航蒼鷹鷄舳紫貝龍堂功
立身退乃懸車杖鄉百年俄頃萬緒悲涼昔時華屋今
日玄房平天慘慘半月蒼蒼地謂西郭山言北却曲池
無處松檟成行

唐昭武校尉曹君神道碑 前人

君諱通字某其先沛國譙人也近代因官遂居于瓜州
之常樂縣故今為縣人馬顓頊高陽之子孫曹叔振鐸
之苗裔山河白馬漢丞相開一代之基譙沛黃龍魏武

帝定三分之業承家

集作苗

卹肩岳峙星羅居雍州

集作之字

西境斷匈奴

集作之字

右臂門容駟馬旌旗玉塞之雄坐列

三貂人物金行之秀祖某隱居不仕父顯盪寇將軍河
庭寶玉廣都鸞鳳或閭閻之內禮敵於諸侯或抱鼓之
間威振於千里功則可大以官族而為官德亦不孤惟

將門而有將君天才卓越雄略縱橫陶謙性好於幡旗
王濬志在於長戟東方諫議口誦孫吳諸葛武侯坐吟
梁甫屬有隋之末四海分崩皇運之初三光草昧五星
同聚田橫猶在於草集作每中九代飛檠隗囂尚屯於隴
右賀拔盛操符誓衆斬木稱兵以雕題鑿齒之餘
負勁努強弓之勇遂欲驅馳我塞北撓亂我河西天子
不憚於廟堂鼓其雷電使者相望於道路申其弔伐武
德元年乃詔侍中楊仁恭出使先之以德義陳之以兵

甲七旬干羽不籍有苗之師萬國侯王坐見防風之戮

君深知逆順獨斷曾懷去危即安轉禍為福非如馬援

傲集作來遊二帝之都不學竇融自保三分之重勅授昭

武校尉鮮卑醜類慕容殘孽遷於大棘之城止於小蘭

之界雖謂其羣下願聞禮於上宗集作京而拜以將軍遂

誇大於諸國貞觀八年詔特進代國公李靖為行軍大

總管登壇拜將授鉞行師開太一之三門閉陰符之六

甲決勝於俎豆然後折衝萬里信賢如腹心故能匡正

八極君當仁不讓間義則行從王粲之戎旅棄班超之

筆硯係單于之頸有類長沙斬樓蘭之王更加平縣集作

樂詔除上騎都尉車師舊國俯桃枕集作前庭戊巳遺墟

斜連後壁負天山而版蕩擁蒲海而度劉聖人之德非

欲窮兵黷武王者之師蓋為夷凶靜亂十四年詔兵部

尚書侯君集為行軍大總管軍營玉帳武畧珠韜旌旗

蔽於日月金鼓聞於天地安人保大實憑帷幄之謀斬

將塞旗誠藉武夫之力君緬懷高義思報國恩從來六

郡之子是惟

集作
為

萬人之敵梯衝所及攻靡堅城矛戟

一作第
伐匪

所臨野無橫陣一舉而清海外再戰而滌河源

飲至策勲抑惟恒授詔除上柱國君備嘗艱阻頻有戰
功天子聞之累加徵辟募田疇之節羞賣盧龍之塞高
魯連之義請從滄海之遊遂乃散髮鄉亭拂衣邱壑為
趙魏之老在義皇之上

集作
年

關內諸公深知郭解洛陽

人物高談劇孟家僮有禮皆使拜賓門客多才咸能市
義南宮養老坐間鳩杖之榮東岳遊魂俄見鶴書之召

以龍翔元年某月某日終于里第嗚呼哀哉夫人某官

之女也流湘降祉河洛騰休符玉石之堅貞貫風霜之

慘烈鏡飛天上窺祥鳳

集作死
鸞鳴

於銀臺劔動星文秘蛟

龍於玉匣以某年某月日終越某年月日合塋於某原

君孝實因心忠為令德鮮花匝苑

集作
樹

盡兄弟之歡娛

好鳥鳴林展交遊之宴喜太初朗月俯照金鞍叔夜清

風來生寶劔故能戰必勝攻必取西零種族遙憚武臣

北漢首豪見稱飛將雖死之日猶生之年園令獨慕於

相如漢帝長懷於李牧長子游擊將軍和政府右果毅
都尉上柱國永雄次子朝散郎行西州柳中縣主簿上
騎都尉知君等三餘廣學百戰雄才就養之方兼申愛
敬慎終之道不忘哀戚雖雨崩

闕

子之格言而

鼠齧前松

集作
末禾

有文王之故事即以某年月日改塋於

木城之平原長婦某氏即永雄之妻也某官之女柔風
淑譽習禮聞詩上奉舅姑旁睦娣姒溫家之婦方歡白
玉之臺盧氏之妻空對黃金之椀先以永淳元年某月

日終至是即陪窆于塋內右翊衛弘軌兵圖日用劔術
天知六郡許其良家三川養其聲利思弘祖德願叙家
風託無媿之銘跋涉載勞於千仞訪他山之石東西向
踰於萬里炯効官昌運負譴明時始以東宮學士出為
梓州司法傾蓋相逢當仁不讓庶使見曹娥之碣楊修
歎其好詞讀元壽之文高祖稱其佳作其詞曰

大矣丞相天地翼

集作寅

亮烝哉侯王子孫蕃昌條分葉

散源濬流長金城北見

集作峙

玉關西侯山澤駢羅冠車

集作衣冠輻湊降神生德興賢誕秀曰有人英材標國植髻

年學劔州

集作弱

歲論兵以身許國東討西征皇家啓聖

撥亂反正逆賊遊魂不恭王命亦既授首河西大定叢

爾湟中車書未同帝赫斯怒攢其英雄風行電

集作地

轉

谷靜山空二庭遺孽交河路絕天子聞輦元戎按節王

師無戰海外有截歸我田廬功成不居歲云秋矣日月

其除壽非金石命也如何孝乎兄弟塋之以禮蓼蓼者

我人生若多言猶在耳眇邈

集作邈若

山河

文苑英華卷九百十

欽定四庫全書

文苑英華卷九百十一

宋 李昉等 編

職官十九

都督

周河州都督普屯威碑一首

唐并州都督尉遲恭碑一首

周上柱國宿國公河州都督普屯威神道碑銘

并序

庾信

公諱威字某河南洛陽人也舊姓辛隴西人基若水之

源纂商邱之胄邑于大亳實定其居封于小辛乃成其
姓是以山川被髮辛有得見事之機八卦占爻辛廖有
知人之鑿佐治以東都上將魏帝解衣武賢以西國功
臣漢王推轂祖大汗武川太守考生河州四面總管大
都督隴右貴臣河西鼎族公侯踵武岳牧連鑣並得聲
振長榆名雄高柳公秉靈山岳誕載星辰結髮巖然韶
年成德澄波萬頃建標千仞鋒穎既高光芒已遠青衿
學劔既為人主所稱童子論兵即在中軍之策永熙元

年入仕蒙授直盪都督太祖文皇帝雪舊君之恥連西
伯之功始裂鴻溝初登函谷公擢衣沐髮杖劔轅門撤
洗足而相迎下賓階而顧問自此即居帳內仍為直寢
授寧遠將軍羽林監白土縣開國伯邑五百户大統元
年從迎大駕進爵為侯增邑三百户加冠軍將軍散騎
常侍轉大都督公善於用兵長於撫御自攻洛陽定弘
農戰河橋平沙苑冒刃衝鋒前無橫陣况以弦木六鈞
函犀七屬門多懸冑箭必中鞍山積器械谷糧牛馬軍

吏計功司勳賞策授使持節銀青光祿大夫進爵為公
增邑八百戶昔者受律赤符韓信當千里治兵白帝張
飛擬萬人皆此於今日公之謂也五年授使持節都督
揚州諸軍事揚州刺史浮於一作于江海達于淮泗篠簜

既敷瑤琨即序十三年授車騎大將軍儀同三司尋遷
驃騎大將軍開府仍賜姓普屯即為官族入陪武帳出揔
戎韜置府於陽關張旃於瀚海故得上書於漢即用同
宗爭長於周還無異姓十六年授鄜州諸軍事鄜州刺

史公穎煩兩牧風政神明虎去西河梟移東郡河湄瑞
氣特表廉平廊祀神光偏明正直及乎魏終天祿周受
惟新明命已遷彝倫或革周元年改授大將軍抱罕郡
開國公增邑一千戶軍中受詔非論北伐之功大將登
壇無待東歸之策置陣太平開陰晉之道連兵廣武納
滎陽之城校戰丹山移營白壁莫不勇冠三軍名凌五
將保定四年授寧州摠管掌其北門既為鄭國所委捍
其西鄙無懼秦亭之逼是以築平綱之城衛人拱手戍

榮波之澤梁氏寒心朝廷與公有內外之親令公從戚里之貴乃以魏文帝女為公夫人遂得長門之左別開公主之園濯龍之傍便有王姬之館五年被徵入京拜

少

本傳作小

司馬期於司武以公為魏絳佐於中軍以公為

荀首豈直謂之鷄火稱之縉雲而已哉其年被使領兵出西涼州奉迎突厥皇后紀制

疑衍

裂繻來卿為君逆稱

族而行尊君命也天和元年授柱國拜大司寇楚之柱國方之南火軒之司寇譬以西雲總授於公能官人也

建德二年授少傅四年授河州總管都督七州諸軍事
即為河州大中正公之桑梓本於此地再為連率頻仍
衣錦襄城龍種更及池臺桂陽仙人還歸鄉里故老親
賓酣歌相慶安車駟馬天下榮之宣政元年授上柱國
更加少傅配於上相即陪玄扈之圖居於京師實有圮
橋之策改封宿國公食邑并前五千五百戶射鴻舊圃
舞鶴餘城既浮酸棗之河聊對淇園之竹來朝建章則
天子降席出遊戚里則羣公下堦是以行滿天地名聞

四海方當光輔五軍參謀七政天厲弗戒薨於所居春秋六十有九柳莊告殯傾社稷之臣鄭僑云亡得諸侯之禮詔贈某官諡某公禮也以今開皇元年七月某日反葬於河州金城郡之苑川鄉山行隴底地入塞原望積石以緣河臨崆峒而下坂玄甲黃腸崎嶇亭鄣及云奠徹方勞榆沈若夫樹反壤也封夏屋焉終須潁川之碑乃見華陰之碣世子儀同永達孝性有聞居喪得禮嗟海變而田成懼山飛而地絕勤石墓田仍銘云爾

少典之孫玄王之子貫於月金承於水降及於周公侯
復始風俗氣候山川表裏河連積石山帶崆峒秦亭北
上漢使西通金行氣壯地勢人雄稜稜高節凜凜踈風
祖考藩屏濁河清渭兩地謨明雙流光貴水無別色雲
無異氣為吏為民惟懷惟畏公之嗣世實秉英靈降神
中嶽迴文列星鸞翔鳳顧珠角山庭臣深義本子極天
經洛城戰陣河橋旗鼓箭飲石梁劒燃銅柱並麗六麋
俱抽雙虎玉門開羣陽關置府再為上台兩為少傅模

範帝師經綸國步允襲峻德欽明審諭不吝車茵誰言
溫樹天道茫昧年齡倏忽上將星開功臣鼎沒九原陵
阜三河甲卒地險龜林營危馬窟西州永別北闕長辭
山張虛蓋野祭空帷陵原地迥松路風悲銘於碣石勒
以貞龜

唐并州都督鄂國公尉遲恭碑

許敬宗

蓋聞嶽靈昭眈協其神者申甫緝象騰祉含其精者伊

傳用調芳玉鉉增耀金符譬八柱之承天猶四溟之載

地是以郊郊創歷冥契非鄙

一作熊

之兆沛野開基鬱會

攀鱗之傑莫不凝徽簡策篆勳戈鼎此裂

一無此字

河西而

濟美期礪嶽以疇庸若乃經啓睿圖彌綸聖業扈兵師

於丹水夷餌石之祆渠振文策於烏江掃拔山之巨稜

抑揚七佐鎔鑄五臣致我后於勛華軼前修於樊灌名

高絕代其在忠武公乎公諱恭字敬德河南洛人

唐書作翔

州善陽人也原夫玉派靈長控昌源於弱水瓊基峻遠峙層

構於軒臺叶粹氣以擒賊威橫朔野奄崆峒而擅武跡
跨中原亦猶江馬南浮圖基巨麗溟鯤北運激勢扶搖
是故軒冕傳華半神州而交蔚忠良秀美暎帝里而馳
芬與夫由余去危斥剪敦而作霸日碑受顧光珥貂而
累華考諸聲實固不同年而語也曾祖本貞後魏中郎
將冠軍將軍漁陽郡開國公贈中外六州諸軍事一作使
諡曰懋道粹黃中寄侔丹化襲徽章於珪瑞飛茂績於
鍾鏞大父益都北齊左兵郎中遷金紫光祿大夫入周

濟州諸軍事濟州刺史雕鏑杞梓黼藻人倫用匪齊鈞
亟深微管之寄價符趙璧愈擅入秦之美考伽隋授儀
同三司衛王記室皇朝追封常寧安公贈汾州刺史幽
州都督材緯三端揚鑣武庫位階一命頓轡文房下調
悲於季葉飾壤昭於昌運故知壯氣猶生貫千秋其尚
想名臣不作瞻九原而增悼再緝部符之贈式冠封墳
之典公鄧林抽穎崑嶠疏源非假七齡早鬱凌霜之幹
爰滋九潤先孕聯雲之寶瞻言廣術企列戟於髫初屬

相傾義俯迴戈於度內雄姿岐嶷覆篲裁規沉勇潛貞
涌泉韞量飾躬由禮檢性依仁匪衛祓於齊挑函翹誠
於孟荀言泉河瀉應千里而無違俠氣颺騰輕百金而
有裕加以鈐符玄秘劔術精微偃月疏營右澤左陵之
勢浮雲鴈陣鷲張鶴列之奇莫不夙契靈臺暗窮神奧
由是譽光日下聲蓋秦中而翠虬驤霧必先階於尺木
紫鷲追風初發蹤於步武爰膺執戟之選以効棄觚之
節蒙授元師都督拜朝散大夫轉議正大夫加銀青光

祿大夫大業十二年也未展雄飛載羈下列何意乎九

苞呈瑞儷彩司晨一角効祥儔蹤警夜俄而運鍾旒冕

疑

政弛永

疑

衣大浸襄陵長虹貫日公迺行吟梁父希

管晏以思齊屈跡淮陰俟蕭張而佐命皇家補傾極振
顏網提劔風驅援旗電掃劉武周不稽天氣寔暗人謀
怒窮轍以抗威臨焦原而自逸公見縻昏偽迫以驅馳
取譬辛毗甫依表而免戾同夫馬援聊寄隗以偷全尚
鞠醜徒據其危堞太宗俯離鳳邸親御龍韜軍次介休

將屠偽邑早欽英畧深嘉義勇飛箭以述皇威投金以

申同德公鑒窮無象識照先機虛

一作雪

西楚之如狼陋

張角之吠犬遽歸真主期乎定人擢授秦府統軍于時

帝道維新王途多故瑞雞之野式靜雲雷獻蜃之川未

均霜露蕞爾凶狡久肆回邪載動神兵龔行天罰救楚

妙筭雖獨運於冲襟授律宏規固思憑於猛將乃以公

為行軍總管遵彼前茅

一作旌旄

追奔若順海乘茲破竹潰

敵如決河積甲齊山中嶽由其咸定封屍築觀王城於

是又安飲至鎬京策勲居冢所賜金帛蓋以千箱其後
六統偏師五為總管北殲猾夏南廓滔天戮鯨鯢於洙
泗溺駢驪於漳滏所向風靡賞鉞彛班時外難初康內
釁方兆春坊階亂構禍深於戾園李屏窮凶為蠹尤於
傲象公早叅帷幕思固宗祧驟起聖懷累明大義九年
六月二凶伏辜雖天道禍淫蓋賴君之筭也擢拜左衛
大將軍兼太子左衛率貞觀元年授右武大將軍屯兵
數萬咸令統領職歷二官兼司七校龍飛靜拆揔禁旅

於瑤山馬珥臨戎肅嚴兵於錡禁於是威馳銀榜寵峻
金吾拜上柱國吳國公食邑三千戶實封一千三百戶

若遷

疑黼曰疑

疏峰奄衡巫而廓鎮雷導風

一作

驅區遇

功瀉江漢以咸池餘礫涵輝明珠韜媚是稱奧壤獨擅

雄州佇寄惟良以敷景化連帥之重僉曰爾諧貞觀四
年授襄均鄧浙唐五州都督襄州刺史班朝驚俗載屏
丹帷虛犴遷遶寧因赭服布中和而驛化浹旁潤以馳
威惠澤潛通吐浪由其絕渚仁風普暢嘯谷所以浮江

弛風牘於東臯歲儲京庾契成麟於西序家知禮讓道
彼湘沅俗均鄒魯里稱冠蓋既洽毗謹地接股肱佇求
人瘼八年授光祿大夫行同州刺史封建功臣改封鄂
國公冊拜宣州刺史昔炎周裂壤滎陽茂十邑之庸有
晉疇榮壯武峻重封之典校其優劣詎可扶輪累遷靈
廊夏三州都督懋茲宏德函牧大藩控十角於星街信
覃玄塞揔百城於天塹義偃朱方端委之風褫危冠而
變俗毳裘之長棄鳴鏑以歸仁泪乎紫封流渥朱輪徒傳

莫不情深借寇戀切留黃可謂柔遠以德人稱遺愛者
矣既而俯鑒忘筮景文成之茂躅深惟滿器躡太傅之
高蹤漏促銅儀循良夜之不急體安玉杖諒坦路之難
追奏擬青規辭榮絳闕特迴天睠賜一作肆其誠請於是

冊拜開府儀同三司禮秩加等已而從容廊廟怡暢邱
園架燾圖蓮疏池瀉箭後堂歌吹通逸響於南隣別業
林泉接芳陰於西第加以陶風元穆勳胄兼之里遂高
陽門承通德故能聯姻瑤府結慶璿枝榮亞元吉寵班

右威清樓聳構遙通婺女之津黃閣凝扉近接天孫之館長筵綺合韋珠與謝玉交輝廣廡雲浮籥共擬金遞

奏庭烏劾社燮曜槐端隙駿流年俄潛

闕

嗟乎巨川

既濟奄遷舟於夜壑高臺遽傾條摧梁於夢奠粵以顯慶三年十一月二十六日遘疾薨於長安之私第春秋七十有四皇上情切宗臣痛深國老舉哀別次罷朝者累辰昔平仲云亡趨輪軫慟宣尼告逝述誄申哀未足方此撤懸喻斯輟祭追贈司徒詞曰飾終之典實屬於

勲賢追遠之恩光歸於令望故開府儀同三司上柱國
鄂國公敬德志局標舉基宇沉奧忠義之節歷夷險而
不渝仁勇之風雖造次而必踐迺誠申於伯府茂績展
於行陣西漢元勲韓彭非重東京闕將吳鄧為輕著恭

肅於軒陛馳聲猷於藩岳方隆朝寄之榮便追止足之
分闡雄林而兼濟植高操而孤往道映千古舉光百辟
與善俄褰殲良奄洎永言遺烈震動于心宜崇禮命式
旌幽壤可賜疑作司徒使持節都督并蔚嵐代等四州

諸軍事并州刺史餘官封竝如故所司備禮冊命給班
劍四十人及羽葆鼓吹贈絹一千五百段米粟一千五
百石陪葬昭陵葬事所須並宜官給并賜東園祕器儀
仗鼓吹送至墓所仍送還宅并為立碑仍令鴻臚卿瑯
琊郡開國公蕭嗣業監護光祿少卿殷令名為副使務
從優厚稱朕意焉又下謚詔曰名以實稱事光於前典
謚為表禮縟厚於尊言故博聞強立少傳擅文成之美
行剛服遠冠軍膺景植之賜故開府儀同三司上柱國

鄂國公贈司徒并州都督敬德襟宇宏邵機神祕遠氣
茂英果情馳義烈闡雄圖而贊業標峻節以擬功道叶
宗臣望隆時宰愛升九命之寵宜享三尊之位福謙從
說悼往增酸奉上危身誠許國之貞操安人和衆亦經
邦之懿範祥式茲典錫以大名可謚忠武仍遣使持節
備禮告柩以顯慶四年歲次己未四月丁未朔十四日
庚申陪葬于昭陵禮也惟公資和清粹稟銳雷霆勇冠
六軍不失獨夫之色志澄四海期於萬里之外登范車

而繹慮撫陳室以栖情蒼壁內融負青冥其非遠白珪
外審體黃裳而愈固藝或微而咸綜枝雖末而旁該象
弭初彎先穿卧石魚文且擊遂引飛泉擅扛鼎而推雄
掩蒙輪而効捷觀其事親孝事君忠居身節與士信識
通其變遠鑒窮於未形智括其神臨事期乎不測非外
物之攸獎咸宜體以自然運屬艱虞披荆而扶帝業功
宣草昧借箸以沃神襟載扈升陲爰叅誓牧掩孫吳而
高視輔韓白以長驅是以捨代偃齊似青邱之吞夢澤

推堅衄銳猶黃間之穿魯縞祥符捧日亮堯景而增輝

道契從風變虞薰而演化故能丹書誓策青社疏榮位

兆衝諸疑資五申而統律寄深錫壤按十部以宣風年

暨抽簪禮優執醕懸輿勝躅昭茂寵於安車納駟高門

峻朝章於行馬斯所謂道烈可紀今終有倣者歟有子

右領軍將軍寶林鳳羽摛姿龍媒騁逸丞相之子道懋

傳經王公之孫望高倒屣掩八屯而効職副九列以騰

芳履孝揚名克隆華閥顯親穆譽爰樹豐碑紀德廬山

載表茂陵之域題貞畢陌式分京兆之阡庶令過客披
文立名可則故懷斯惠望拜知歸其銘曰

商周龍躍尹望鷹揚風雲宜感鱗鬪曾驤於赫皇祚禋
禎會昌錫茲元弼勲烈推光茂德初誕英徽早暢狼宿
搞精龜文協貺棄繻關下受符圯上祕策金韜騰猷玉
帳貞心孤邵猛氣橫飛長戈參捷雄戟雙揮蛟分承影
鴈落忘歸韜竒佇睿屈跡乘機釁起射天妖凝鬪日明
一光啓半千秀出道契披捧功宣授律冀北先馳圖南

載逸受服揚威專征耀武馬陵削樹爲方鑄柱雲卷鳴
祠風謳嘯雨靜浸破竹銷氛玉弩戎衣武定河帶同盟
望高四履寵峻千兵裂壤扮邑分麾抑營網羅方邵躡
跡良平出建隼旗入叅鳳輦名班贄玉賁光儀鉉朱戶
吟笳青門樹冕金裝甫散璇霜遽踐昔恭丹宸載奉薰
琴今陪玄襪空悲穀林紛紛禮禡杳杳光沉閣桐永閔
宰樹方深信瞻言史策遠振徽音

文苑英華卷九百十一